

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

07 Septembre 2018  
(26 Dhul-Hijjah 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : : « *Dua dans l'Islam.* »

وَأَبْتَغُوا إِلَيْهِ الْوَسِيلَةَ

« **Cherche le moyen pou rapproche ou avec Li (Allah).** » (Al-Maida 5 : 36).

« Ô Allah, To en vérité Celui qui pardonner et To content pardonner, alors pardonne moi » **Ameen!**

Le *dua* c'est ene imploration, ene la prière, ene demande, ene supplication ki nous, l'*Ummah* de Hazrat Muhammad (saws), la communauté musulmane, nous adresser à Allah (swt) pour ki Li satisfaire nous bane besoins, Li accorde nous So bane bienfaits, Li pardonne nous nous bane péchés, aide nous pou surmonte nous bane difficultés, et pou aide nous pou résoudre nous bane problèmes, pou corrige nous bane défauts, pou trouve le bon chemin, pour ki Li éclaire nous lé cœur pour

faire la différence entre le bien et le mal, pou trouve le vrai chemin et la paix intérieur et afin ki nous rapprocher avec Li.

Le *dua*, c'est z'arme préféré de tous bane prophètes et de tous bane vrais croyants pieux afin ki zot amène à bien bane responsabilités, bane travaux difficiles ki fine donne zot, et pour ki zot capave subir et supporte tous bane calvaires ki vine lors zot chemin et ki zot pou continuer subir. En d'autres mots, si dans le passé, bane prophètes et bane dimounes pieux fine bizin passe par sa l'étape difficiles là, alors azordi jour et aussi dans l'avenir bane élus d'Allah et bane serviteurs pieux d'Allah pou bizin zot aussi passe par toutes sortes kalité la flamme. À travers plusieurs versets du Quran Shareef, nous apprane couma bane prophètes Nuh, Ibrahim, Moussa, Ayub, Zakariah et bane les autres messagers ti pé fer *dua*, surtout pendant bane moments difficiles de zot la vie.

Et le Livre Sacré, c.-à-d., le Quran Shareef enseigne nous couma le Sceau de bane prophètes, Hazrat Muhammad (saws) ti pé fortement recommande à bane croyants pou sollicite l'aide d'Allah (swt) dans tous circonstances. À tel point ki pour commence ene travail nous bizin faire ene *dua* bien facile : « *Bismillah* ». *Dua* c'est le meilleur moyen pou gagne ene relation sain, parfait, agréable entre l'homme et so Créateur, ainsi ki pou permette la foi pou prend racine dans l'homme et pou ki li conner ki été vraiment la foi, parski même bane prophètes ki représente le sommet de l'humanité quant à zot proximité avec Allah (swt) et zot lien avec Li, alors, même sa bane prophètes là ti bizin toujours ena recours à bane *duas*.

Nous pas bizin alors, en aucaine cas, néglige sa acte d'adoration là, sa meilleure adoration ki ena – après *Salât* et Quran - envers Allah (swt). Parski, si ou bien guetter, dans *Namaz (Salât)*, c'est bane versets Quran ki nous lire et aussi beaucoup de bane *duas*. C'est *duas* ki garni nous *Namaz*, nous bane *Ibaadat*. Le Saint Prophète (saws) fine ena raison et fine bien précisé concernant *dua* kot li fine dire: « *Dua c'est la moelle de l'Adoration (Ibaadah)*. » (Tirmidhi). Kifaire nous bizin faire *duas* à tout moment pareil couma plusieurs Hadiths fine recommande nous ?

En effet, sa besoin ki nous ena pour faire bane *duas*, c'est en fait nous besoin pou exprime sa la foi ki nous ena en Allah (swt) là, et pou travail avec le but pou maintenir li vivant à l'intérieur de nous-mêmes, et pou ki nous renouveler li à tout moment et pou consolide li de façon constant, perpétuelle.

C'est pourquoi fine mentionner dans sa Hadith là ki *dua* c'est « *L'essence de l'Adoration* », kot fine littéralement mentionner dans sa Hadith là ki *dua* c'est la moelle de *Ibaadat*, parski li exprime la signification profonde de la servitude de la soumission et du recueillement ki l'adoration (d'Allah) incarner (représenter). Et sa recueillement là c'est kot nous médite et concentrer lors Allah et nous contempler Li avec lizié de nous lécoeur, avec ene confiance absolue dans Li. Le *dua* aussi faudé pas li considérer couma ene simple rite traditionnel kot ene dimoune li lève so deux la main vers les ciels et ki li murmure des trois mots tout en guettant à droite et à gauche kot so lizié pé balader et pé espionne zaffaires les autres.

Non ! Sa pas appelle *dua* sa ! Le *dua* li ene communication directe entre l'homme et so Créateur ; li ene période kot sa dimoune là li concentrer li exclusivement lors Allah, kot li pas ena bane les autres pensées, aucaine les autres réflexion aparte ki li adresse Allah (swt) dans so propre langage, dans so propre style, dans ene position ki confortable pou li, kot li à l'aise pou adore Allah couma li désirer. Le plus grand moment ki ene serviteur d'Allah li proche avec Allah, c'est kan li dans *Sijda* et li profite de so *Sijda* pou faire beaucoup de *duas*, kot li humilier li devant so *Rab*, que ce sois dans *Masjid* ou dans la caze, pendant bane *Namaz Farz*, *Sunnah* et *Nafils*, kot li déverse so bane la peines, et li partage so contentement aussi avec Allah, kot li remercier Allah pour tous bane bienfaits et li faire louanges d'Allah et glorifier Li. Sa li ene telle moment kot li mette li dans ene l'état kot li pli bas ki la terre, et ki zis Allah ki capave élève li spirituellement dans ene position d'honneur auprès de Li. De plus, couma mo fine fek dire, sa croyant là li capave lève so deux la mains et invoke Allah, mais selman li faire li avec ferveur, cherchant l'aide et secours avec Allah, et remercier Li et rende grâce à Li. Li concentrer dans so *dua*, dans n'importe ki position li été, ki li deboute, assizer ou allonger, kot li mazine Allah, et li garde le souvenir d'Allah vivant dans so lécoeur et li fer so lécoeur, so l'âme et so la langue physique et spirituelle, dans ene la voix ki pas dérange personne ou dans so lécoeur, kot li invoque Allah et cherche So l'aide et So présence en toute circonstance.

Ena plusieurs versets Quran kot à travers sa Allah (swt) Li-même exhorte bane croyants pou adresse Li zot la prière, zot bane demandes, c'est-à-dire, *duas*, pour ki Li exauce zot bane supplications, zot bane *duas*, c'est-à-dire, sa bane demandes là.

« Et kan Mo bane serviteurs pose toi bane questions lors Moi (dire zot) ki Mo près de zot. Mo réponde zot l'appel kan zot appelle Moi. Zot aussi bizin écoute Mo l'appel, et gagne la foi en Moi, afin ki zot trouve le bon chemin. » (Al-Baqara 2 : 187).

« Ou Maître (Rab) dire : 'Faire appel à Moi, Mo va réponde ou l'appel. Bane ki faire vantard et refuse adore Moi pou rentre dans l'enfer, humiliés. » (Al-Momin 40 : 61).

Sa deux versets Quran Shareef là bizin être étudié sous l'angle de zot valeur spirituelle. Zot montrer deux l'aspects de l'importance de *dua*. Dans le premier verset, Allah (swt) compati à la détresse de bane serviteurs et encourage zot pou faire appel à Li, et Li promette zot ki Li pou vine en aide à zot et ki Li pou satisfaire zot bane besoins.

Dans deuxième verset là, *dua* li présent couma ene acte d'adoration pour lequel bane dimounes bizin témoigne de zot servitude envers Allah (swt), sinon zot pou paraite couma bane arrogants envers Li et alors zot pou mérite So punition sévère. Eski *dua* li pas ene moyen efficace pou atteindre le salut dans sa le monde ici-bas là, mais encore beaucoup plus dans *Aakhérat* ? Et eski li pas tire ene la ligne bien claire pou faire différence entre ene croyant et ene non-croyant, et entre paradis et l'enfer ?

Allah dire dans Quran Shareef: « **Dire (bane infidèles): 'Mo Maître (Rab) pas pou prend cas de ou, si ou pas faire appel à Li (si ou pas invoke Li – fer *duas*). Ou fine rejette la foi et ou fine attache (punition là) are ou.'** » (Al-Furqaan 25 : 78).

Pé faire comprend dans sa verset là ki Allah prend bien soin de So bane serviteurs proportionnellement au degré de lien ki zot établir avec Li à travers bane plusieurs *duas* ki zot faire. Certains dimounes capave même pose la question pou rode conner si vraiment bane *duas* ena ene telle grand l'importance dans rapport de l'homme avec so Créateur. En effet, bane *duas* (invocations) résume à ene l'expression vivant du sentiment de l'homme de so besoin constant pou Allah (swt), dans tous so bane zaffaires, et de la reconnaissance profond de so servitude, ki incarné par so conviction intime de so l'attachement à Allah et de la soumission totale de so l'existence à Allah tousel. Il va de soi ki nous pas pou capave atteindre ene la foi vivant, pure et incassable dans Allah (swt) sans sa sentiment et conviction là, parski la foi ena sens zis kan kikaine ena la conviction

intime de l'existence d'ene toute-puissance illimité et d'ene la force absolue et infinie devant quoi l'homme li apparaite faible, bien faible même, impuissant, et incapable pou justifier so l'existence excepter zis par la volonté d'Allah (swt) seulement.

Pour terminé, mo faire sa *dua* là ki Allah renforci nous la foi, pardonne nous nous bane erreurs et guide nous lors le droit chemin ! *Ameen. Insha-Allah*, mo pou continuer lors le même sujet de *dua* Vendredi prochain, *Insha-Allah*.